

1. UVOD

Vrhunski rezultati u atletici, koji se danas postižu, rezultat su strateških planiranja u svakoj sportskoj organizaciji. Vrhunski rezultat označava maksimalne sposobnosti sportiste u određenom trenutku, te se na taj način materijalizuju uloženi naponi sportiste, njegove biološke, psihološke i sociološke sposobnosti. U vrhunski rezultat su ugrađeni i drugi uslovi i odnosi, trening i kvalitet treninga. Vrhunski rezultat se postiže samo u razvijenim sportskim sredinama pa u njima imaju afirmativnu, podsticajnu i razvojnu funkciju. Da bi se ostvarili vrhunski rezultati neophodni su izuzetni naponi, kompletan angažman i podrška porodice, škole, sredine u kojoj sportisti žive i rade. Oni zaslužuju punu pažnju društva, od vrhunskog stručnog kadra do materijalne pomoći. Vrhunska ostvarenja se ne postižu svakog dana pa su neopravdana očekivanja da veliki broj sportista iz male sredine to mogu da ostvare. Atletiku, koja je zadnjih godina doživjela veliku ekspanziju u postizanju svjetskih rekorda, takođe karakteriše i visok standard (dvorane, rekviziti, oprema, higijena, ishrana ...). Istovremeno, sve to prate velika materijalna ulaganja jer bez njih nema ni moderne atletike. U takvim uslovima se postavlja pitanje: Šta činiti u našim uslovima? Osnovno je izdefinisati atletski ambijent i atletiku i tako doprinijeti da se što manje griješi u stručnom radu, selekciji, ulaganjima, kvalitetu, jednom riječju «investicijama», a sve u cilju da se u bližoj perspektivi mogu kvalitetom integrisati u međunarodne atletske tokove. Dosadašnja iskustva, u zemljama koje su se već susrele s tranzicijom, ukazuju da je ovo period investicija u izgradnju sportskih objekata i dizanja standarda trenažne tehnologije i takmičenja. Osnovni cilj koji moramo postaviti je nastavak kontinuiranog napretka bosanskohercegovačke atletike, pogotovo članova AK „Sloboda-Tehnograd“ iz Tuzle. Ako imamo u vidu

rezultate koje su ostvarili atletičari i atletičarke s područja Tuzlanskog kantona u prethodnom periodu, dolazi se do zaključka da ne trebamo zaboraviti načine na osnovu kojih smo došli do tih rezultata. Ipak, danas je neophodan novi, savremeni model strateškog planiranja pomoću kojeg se mogu ostvariti postavljeni ciljevi, a to možemo postići: razvojem talentovanih pojedinaca, razvojem klubova i razvojem regionalnih centara, izgradnjom sportskih atletskih otvorenih i zatvorenih terena, školovanjem stručnog kadra i sistemom takmičenja.

Dugoročan plan razvoja atletskog sporta u Bosni i Hercegovini koji je prije tri godine usvojio Izvršni odbor ASBiH, odlična je platforma za novi razvoj atletike u Bosni i Hercegovini.

Vjerujemo da je „Strategija planiranja vrhunskih rezultata u atletici“ jedini način da se osigura plansko provođenje zacrtanih ciljeva. Ostvareni rezultati AK „Sloboda-Tehnograd“, u šezdeset i dvije godine postojanja, garancija su da imamo potencijale za velike sportske domete, jer analiza dosadašnjih postignutih vrhunskih rezultata u atletici, kao što su osvojene medalje na Svjetskom i Evropskom prvenstvu, Mediteranskim i Balkanskim igrama, govore da možemo ostvariti rezultate na evropskom i svjetskom nivou. Poslovanje sportske organizacije, odnosno Kluba kao neprofitnog karaktera, zasniva se na podršci općinskih i kantonalnih struktura koji na osnovu predviđenih kriterija sufinansiraju Klub pa se sa razlogom išlo na to da se u ovom istraživanju dobiju i stavovi nadležnih struktura za sport u Općini Tuzla i Tuzlanskom kantonu. Kako će se atletika razvijati u Tuzlanskom kantonu u značajnoj mjeri zavisi od kvaliteta planiranja razvoja atletskog sporta, kao i načina usaglašavanja razvoja atletike od predškolskog, školskog, studentskog, rekreativnog do takmičarskog, odnosno vrhunskog. Strategija razvoja atletike na Tuzlanskom kantonu mora se posmatrati kroz tematske

čjeline: prostorni kapaciteti, programski kapaciteti, kadrovski kapaciteti, materijalno tehnički kapaciteti, antropološki kapaciteti populacije. Već duže vrijeme se sa sportskim radnicima u Tuzlanskom kantonu vode javne rasprave na temu: Kako organizovati atletiku da bi se postizali rezultati na nivou ranijih godina? Iako je na nivou Kantona usvojen Zakon o sportu, prema kome je formiran Savjet za sport na nivou Kantona, njegova primjena, nažalost, ostala je bez realizacije. Poznato je da je tradicija atletskog sporta na ovim prostorima vrlo velika i duga i da je obaveza svih atletskih stručnjaka da se tradicija nastavi i stvore pretpostavke za njegovo poboljšanje. To je moguće samo planskim pristupom u ovoj oblasti. Jedan od bitnih faktora u razvoju atletskog sporta je stručni kadar. Na području Tuzlanskog kantona egzistira Fakultet za tjelesni odgoj koji proizvodi stručni kadar ali je on, nažalost, malo zastupljen u atletskom sportu. Međutim, mora se istaći da u Atletskom klubu „Sloboda-Tehnograd” u Tuzli postoji veliki potencijal stručnog kadra sa imenima kao što su Vinko Galušić, Zlatan Saračević, Kada Delić, Muhamed Delić, Jasna Fočak, Salih Hot, Drago Pavljašević, Muhamed Latifagić, Nermina Mujić, Halid Gazibegović, koji bi trebao biti odlučujući faktor za strategiju razvoja atletskog sporta u narednom periodu. Veliki značaj mora se posvetiti Dijagnostičkom centru i Zavodu za sportsku medicinu.